

BOSNA I HERCEGOVINA
FEDERACIJA BOSNE I HERCEGOVINE
ZENIČKO-DOBOJSKI KANTON
GRAD ZAVIDOVIĆI



BOSNA I HERCEGOVINA
FEDERACIJA BOSNE I HERCEGOVINE
ZENIČKO-DOBOJSKI KANTON
GRAD ZAVIDOVIĆI
STRUČNA SLUŽBA GRADONAČELNIKA

Primijeno:	06-03-2025		
Org. jed.	Kl. ozna.	Red. broj	Br. priloga
01	11	508/25	

Broj: 02-11-2299/24-AP-4
Datum: 06.03.2025. godine

GRADSKO VIJEĆE ZAVIDOVIĆI
n/r PREDSJEDAVALJUĆI GRADSKOG VIJEĆA
Hadžić dr Amira, spec. radiolog

PREDMET: Prijedlog Odluke o provođenju participativnog
budžetiranja u Gradu Zavidovići, dostavlja se

U prilogu akta dostavljam Vam Prijedlog Odluke o provođenju participativnog budžetiranja u Gradu Zavidovići.

Prijedlog Odluke o provođenju participativnog budžetiranja u Gradu Zavidovići sa obrazloženjem gradonačelnice, dostavljam Gradskom vijeću Zavidovići radi uvrštavanja u dnevni red sjednice Gradskog vijeća.

Obzirom da se ne radi o obimnoj i složenoj Odluci predlažem da Gradsko vijeće Zavidovići Prijedlog Odluke razmatra po skraćenom postupku bez Nacrta u skladu sa članom 130. stav (1) Poslovnika o radu Gradskog vijeća Zavidovići - novi prečišćeni tekst („Službeni glasnik Grada Zavidovići“, broj: 7/2022 i 1/2023).

S poštovanjem

Dostavljeno:

1. Naslovu,
2. U spis.

Akt pripremila: F.M.
(Fatima Merdanović)

Akt pregledao: N.
(Nermin Čahtarević)



GRADONAČELNICA

mr. iur. Erna Merdijć Smailhodžić



Broj: 02-11-2299/24-AP-3
Datum: 06.03.2025. godine

Na osnovu člana 13. stav (2) alineja 2) Zakona o principima lokalne samouprave („Službene novine Federacije Bosne i Hercegovine“, broj: 49/06 i 51/09), člana 19. stav (2) Statuta Općine Zavidovići („Službeni glasnik Općine Zavidovići“, broj: 5/08 i 5/a/2008) i člana 10. stav (1) tačka 2) Privremene Statutarne Odluke Grada Zavidovići („Službeni glasnik Općine Zavidovići“, broj: 4/22) Gradsko vijeće Grada Zavidovići na svojoj sjednici održanoj dana __. __.2025. godine, donosi

ODLUKU

o provođenju participativnog budžetiranja u Gradu Zavidovići

DIO PRVI - OPĆE ODREDBE

Član 1. (Predmet Odluke)

- (1) Ovom Odlukom utvrđuje se provođenje participativnog budžetiranja u Gradu Zavidovići (u daljem tekstu: participativno budžetiranje), kao demokratskog društvenog procesa kojim se omogućava kontinuirano učešće građana u donošenju odluka o razvoju u svom okruženju, naselju, mjesnoj zajednici i gradu, te postupak provođenja participativnog budžetiranja.
- (2) Cilj provođenja participativnog budžetiranja je demokratizacija procesa upravljanja javnim resursima, razvoj aktivnog građanstva i doprinos povećanja kvalitete života u gradu Zavidovići.

Član 2. (Značaj i cilj provođenja participativnog budžetiranja)

Provođenjem participativnog budžetiranja u skladu sa ovom Odlukom

- a) prepoznat će se stvarne potrebe i težnje građana, te će se nastojati odgovoriti na iste,
- b) prikupljat će se ideje građana, grupirati i pretvarati u projekte,
- c) građani će se približiti organima upravljanja i povećat će se transparentnost javne uprave,
- d) promovisat će se aktivno učešće i konstruktivna uloga građana u procesima upravljanja,

- e) građani će se podsticati da postanu inicijatori i predlagači razvoja lokalne zajednice,
- f) promovisat će se dinamičnost, jako i aktivno civilno društvo.

Član 3.
(Načela participativnog budžetiranja)

Načela participativnog budžetiranja su:

- a) transparentnost,
- b) jednakost,
- c) tolerancija,
- d) ravnopravno učestvovanje,
- e) pravednost,
- f) konkurentnost,
- g) efikasnost,
- h) poštovanje postignutih dogovora.

DIO DRUGI - USLOVI I NAČIN PROVOĐENJA PARTICIPATIVNOG BUDŽETIRANJA

Član 4.
(Učešće građana)

Postupak participativnog budžetiranja vrši se na osnovu javnog poziva Grada Zavidovići za podnošenje projektnih ideja građana (u daljem tekstu: Javni poziv).

Član 5.
(Javni poziv)

Javni poziv se objavljuje na službenoj WEB stranici Grada Zavidovići i ostaje otvoren minimalno 30 dana.

Član 6.
(Sadržaj javnog poziva)

Tekst javnog poziva obavezno sadrži:

- a) uslove za apliciranje projektnih ideja participativnog budžetiranja,
- b) dužinu trajanja javnog poziva,
- c) prioritetne oblasti na koje se javni poziv odnosi,
- d) način i format apliciranja projektnih ideja participativnog budžetiranja i smjernice za koncipiranje projektne ideje,
- e) broj projekata koje aplikant može predložiti,
- f) maksimalni iznos sredstava za finansiranje projekata participativnog budžetiranja planiranih u Budžetu Grada Zavidovići, kao i maksimalnu vrijednost pojedinačne projektne ideje participativnog budžetiranja,
- g) tipizirani obrazac za apliciranje projektnih ideja participativnog budžetiranja u prilogu poziva.

Član 7.
(Pravo učešća na javnom pozivu)

- (1) Pravo apliciranja projektnih ideja participativnog budžetiranja ima svaki punoljetan građanin, koji je državljanin Bosne i Hercegovine i ima prijavljeno prebivalište na području Grada Zavidovići (u daljem tekstu: Aplikant).
- (2) Apliciranje projektnih prijedloga participativnog budžetiranja se vrši po principu jedan Aplikant jedan projektni prijedlog.

Član 8.
(Projektna ideja participativnog budžetiranja)

- (1) Projektna ideja participativnog budžetiranja (u daljem tekstu: Projektna ideja) podnosi se slanjem popunjenog prijavnog obrasca i prateće dokumentacije putem e-maila, ili neposrednom predajom na pisarnicu Grada Zavidovići, popunjavanjem tipiziranog obrasca za apliciranje projektnih ideja sadržanom u prilogu Javnog poziva na WEB stranici Grada Zavidovići.
- (2) Projektna ideja mora biti provodiva, društveno korisna, a realizacija predloženog projekta mora biti u nadležnosti Grada Zavidovići.

Član 9.
(Kriteriji prihvatljivosti Projektne ideje)

Kriteriji prihvatljivosti Projektne ideje su:

- a) da je realizacija projektne ideje u nadležnosti Grada Zavidovići,
- b) da ne prelazi Javnim pozivom definisanu maksimalnu vrijednost Projektne ideje,
- c) da je realizacija Projektne ideje izvodiva do kraja tekuće budžetske godine,
- d) da je od javnog interesa i da isključivo doprinosi opštem dobru lokalne zajednice,
- e) da nije vjerske ili stranačke naravi,
- f) da zadovoljava tehničke i pravne uslove realizacije kao što su: da se radi o projektnoj ideji vezanoj za nekretnine u posjedu i vlasništvu Grada Zavidovići, ili da su riješena imovinskoppravna pitanja i da je u skladu sa prostorno-planskom dokumentacijom.

Član 10.
(Sadržaj Projektne ideje)

Projektna ideja u zavisnosti od vrste projekta sadržava slijedeće:

- a) naziv projektne ideje,
- b) opis trenutnog stanja, odnosno situacije na koju aplikant reaguje Projektnom idejom, što uključuje i detaljan opis tačne lokacije sa fotografijama iste,
- c) tehnički opis projektne ideje (svrha, cilj, potrebne aktivnosti) sa potrebnim grafičkim priložima (skicama) u zavisnosti od vrste projektne ideje,
- d) obrazloženje javnog interesa realizacije predloženog projekta, odnosno opis doprinosa realizacije predloženog projekta / rješenja opštem dobru lokalne zajednice, te opis kome je predloženi projekat namijenjen i na koga će imati najveći uticaj,
- e) procijenjenu vrijednost realizacije predloženog projekta,
- f) kontakt podatke Aplikanta (adresa stanovanja, kontakt telefon, e-mail adresa).

Član 11.

(Kordinacioni tim za provođenje postupka participativnog budžetiranja)

- (1) Postupak provođenja participativnog budžetiranja provodi Kordinacioni tim kojeg imenuje Gradonačelnik.
- (2) Kordinacioni tim se sastoji od pet članova i sekretara.
- (3) Kordinacioni tim raspisuje javni poziv za učešće građana u participativnom budžetiranju, prikuplja prijavne obrasce, provjerava usklađenost projektnih ideja sa propozicijama određenim ovom Odlukom i javnim pozivom, a ukoliko utvrdi da Projektne ideje ne sadrže sve podatke iz člana 10. ove Odluke, vraća aplikantima na doradu sa rokom od 10 dana, sačinjava listu projektnih ideja participativnog budžetiranja u koju uvrštavaju sve aplicirane projektne ideje za koje utvrdi da zadovoljavaju propisane uslove, te iste unose na WEB stranicu Grada Zavidovići za potrebe online glasanja.
- (4) Sekretar provodi sve administrativno-tehničke poslove za potrebe Kordinacionog tima.

Član 12.

(Informativne kampanje)

Da bi građani bili upoznati sa procesom uključivanja javnosti u kreiranje participativnog budžetiranja Kordinacioni tim će provoditi informativne kampanje, koje podrazumijevaju razne načine komunikacije sa građanima koje se obavljaju tokom cijelog procesa.

Član 13.

(Postupak odabira Projektnih ideja za realizaciju)

- (1) Odabir Projektnih ideja za realizaciju vrši se elektronski glasanjem putem ankete koja ostaje otvorena za glasanje najmanje 15 dana, a čiji će link biti dostupan na WEB stranici Grada Zavidovići.
- (2) Pravo glasanja za Projektne ideje ima svaki građanin koji se registruje na online platformi za javno glasanje.

Član 14.

(Projektne ideje za realizaciju)

- (1) Nakon provođenja elektronskog glasanja iz člana 13. ove Odluke, i evaluacije istog na WEB stranici Grada Zavidovići objavljuju se najuspješnije Projektne ideje sa detaljnim opisom, brojem glasova koji su ostvarile i definisanim iznosom finansijskih sredstava koji će biti osigurani za njihovu realizaciju u Budžetu Grada Zavidovići za tekuću godinu.
- (2) Projektne ideje sa najvećim brojem glasova, uvažavajući oblast na koju se iste odnose upućuju se u proces razrade nadležnoj gradskoj službi za upravu. Proces razrade Projektne ideje vršit će se u saradnji sa aplikantom i službenicima gradske uprave Grada Zavidovići.

Član 15.

(Proces razrade Projektne ideje)

Proces razrade Projektne ideje podrazumijeva:

- a) obilazak lokacije na koju se odnosi Projektna ideja,

- b) izradu neophodne projektne-tehničke dokumentacije na osnovu Projektne ideje i
- c) definisanje koraka potrebnih za realizaciju projekta.

DIO TREĆI - OSIGURAVANJE SREDSTAVA I REALIZACIJA IZABRANIH PROJEKATA

Član 16.

(Osiguravanje sredstava participativnog budžetiranja)

Sredstva za provođenje participativnog budžetiranja osiguravaju se iz Budžeta Grada Zavidovići.

Član 17.

(Plan realizacija izabranih projekata)

Nakon provedenog postupka participativnog budžetiranja iz člana 5., 11., 12. i 13. ove Odluke Grad Zavidovići planira realizaciju izabranih projekata, te se isti realiziraju sredstvima predviđenim za ovu namjenu u budžetu tekuće godine.

Član 18.

(Realizacija izabranih projekata)

Realizaciju izabranih projekata participativnog budžetiranja vrši Grad Zavidovići putem nadležnih gradskih službi za upravu.

Član 19.

(Izveštaj o realizaciji izabranih projekata)

Izveštaj o realizaciji projekata participativnog budžetiranja sačinjava Koordinacioni tim na osnovu podataka nadležnih službi o realizaciji projektnih ideja, i isti se objavljuje na WEB stranici Grada.

DIO ČETVRTI - PRIJELAZNE I ZAVRŠNE ODREDBE

Član 20.

(Stupanje na snagu)

Ova Odluka stupa na snagu narednog dana od dana objavljivanja u „Službenom glasniku Grada Zavidovići“.

PREDSJEDAVAJUĆA
GRADSKOG VIJEĆA

Hadžić dr Amira, spec. radiolog

OBRAZLOŽENJE

USTAVNOPRAVI I ZAKONSKI OSNOV ZA UVOĐENJE ODLUKE

U članu 13. stav (2) alineja 2) Zakona o principima lokalne samouprave („Službene novine Federacije BiH“, broj: 49/06 i 51/09) određeno je: „Gradsko vijeće usvaja budžet i izvještaj o izvršenju budžeta jedinice lokalne samouprave.“.

U članu 19. stav (2) Statuta Općine Zavidovići („Službeni glasnik Općine Zavidovići“, broj: 5/08 i 5/a/2008), određeno je: „Općinsko vijeće donosi opće akte i druge akte u okviru samoupravnog djelokruga Općine te obavlja druge poslove u skladu sa Ustavom, zakonom i ovim statutom.“.

Privremene Statutarne Odluke Grada Zavidovići („Službeni glasnik Općine Zavidovići“, broj: 4/22), određeno je: „Gradsko vijeće u okviru svoje nadležnosti donosi odluke i druge opće akte kojima uređuje pitanja iz samoupravnog djelokruga Grada.“.

RAZLOZI ZA UVOĐENJE ODLUKE I OBJAŠNJENJE ODABRANE POLITIKE

Participativno budžetiranje je proces u kojem se naglasak stavlja na samostalnu aktivnost pojedinih građana, odnosno formalno i neformalno organizovanih grupa stanovništva, da daju prijedloge projektnih ideja koje će se realizovati u lokalnoj zajednici. Za participativno budžetiranje se uspostavljaju jasna i jednostavna pravila, koja određuju sa kojim prijedlozima je moguće učestvovati u kreiranju budžeta. Građani stoje iza svojih prijedloga, a gradska uprava je za njih partner koji im pomaže da dorade svoje prijedloge u izvodivu formu i istovremeno osigurava njihovu promociju u javnosti. O projektima koje je moguće izvesti se na kraju vrši glasanje, koje je omogućeno svim stanovnicima Grada Zavidovići.

Prednost participativnog budžetiranja je motivacija građana da rješavaju njima bliske teme ili probleme – građani se do značajne mjere identifikuju sa svojim prijedlogom. Građanima treba dati priliku da kroz mehanizme vlastitog učešća u davanju projektnih prijedloga poboljšavaju uslove življenja u lokalnoj zajednici. Kada projektne ideje postanu predmet odlučivanja širih grupa stanovništva, tada se može prepoznati njihov puni značaj. Zbog toga je važan koncept participativnog budžetiranja, koji se utvrđuje ovom Odlukom.

OBRAZLOŽENJE PRAVNIH RJEŠENJA

Ova Odluka je koncipirana u 4 dijela sa 20 članova.

DIO PRVI - OPĆE ODREDBE - čine članovi od 1. do 3. u kojim se definiše predmet, cilj ove Odluke i načela participativnog budžetiranja.

DIO DRUGI - USLOVI I NAČIN PROVOĐENJA PARTICIPATIVNOG BUDŽETIRANJA - čine članovi od 4. do 15. ove Odluke, a odnose se na: učešće građana, javni poziv, sadržaj javnog poziva, pravo učešća na javnom, projektne ideje parcipativnog budžetiranja, kriterije koje moraju zadovoljavati projektne ideje, šta projektne ideje moraju sadržavati, koje tijelo provodi postupak participativnog budžetiranja, obavezu informativne kampanje, kao oblika upoznavanja građana, postupak odabira projektnih ideja, projektne ideje za realizaciju, proces realizacije projektne ideje.

DIO TREĆI - OSIGURAVANJE SREDSTAVA I REALIZACIJA IZABRANIH PROJEKATA - čine članovi od 16. do 19. ove Odluke, a odnose se na: kako se planiraju i

obezbjeduju sredstava participativnog budžetiranja, plan realizacije izabranih projekata, ko realizuje izabrane projekate i izvještavanje o istim.


DIO ČETVRTI - PRIJELAZNE I ZAVRŠNE ODREDBE - čini član 20. kojim se određuje dan stupanja na snagu ove Odluke.


PROVEDBENI MEHANIZMI I NAČIN OSIGURAVANJA POŠTIVANJA ODLUKE


Provedbeni mehanizmi i način osiguravanja ove Odluke su nadležni nadzorni organi, koji u okviru svojih ovlaštenja provode nadzor nad primjenom Odluke, te izriču sankcije za nepoštivanje odredaba Odluke.


OBRAZLOŽENJE FINANSIJSKIH SREDSTAVA ZA PROVOĐENJE ODLUKE I FINANSIJSKI EFEKTI ODLUKE

Finansijska sredstva za provođenje ove Odluke, u ukupnom iznosu od 20.000,00 KM obezbijedit će se u Budžetu Grada Zavidovići.

Akt pripremila: 
(Amira Šibonjić)

Akt pregledala: 
(Džeraldina Miličević)

Akt pregledao: 
(Nermin Čahtarević)



GRADONAČELNICA

mr. iur.  Ema Merdić Smailhodžić